

Taitas

Yesu pi wel wiak kutömweri sëen wë kris-maki 35 pöta Ök won sëen Poolök pep epwer Taitas pimëen retëng ëa. Taitas Krik omën Pool-ring wakaimaupök Krit kustak ingre mor saurö ngarangk ëak wëen Poolök epwer retëng ë mena. Pim pep epwer pöt, Taitasën tolëel ngarangk ëëpën pöta ngönöt mena. Ngön epët 1 Timoti pöweri wia pötë ök.

Pöt epël wia.

Ngön ngës rëaut *1:1-4*

Ngönënë ngarangköröa ngönte *1:5-16*

Omën pouröa ngönte *2:1-15*

Wa korkorre pepanöm ngönöt *3:1-11*

Ngön mëet *3:12-15*

¹ O Taitas, ne Pool Anutuu inëen yaaupök pep epwer retëng ë yaningk. Puuk Yesu Kristoë ngön yaaö omën neulëak pimëen yaö elniaurö arim kön wi kosang yewesaut taë wasën pim wëwëetak wë pöta këet këekë ewat sënëak neulëaut.

² Ne ar ya kë sak wëwë kosangët önëëtaan kor önëak arim kön wi kosang yewesaut taë yanuwas. Anutu pi kaar naënëpök yangerak omnant naaröön wiaan pötaan kup nuwia.

³ Pël ëak puuk ënëmak pim akun wia pötak wëwë kosangta songönte pim ngöntak tekeri wes nina. Anutu kama yanuwa pöpök ngön epët nenak ök amëak neaan pël yeë.

⁴Taitas niin ngönën ök niaan nem yeë pöl kön wi kosang wesak nem ru panë saup, niin yoöre ërëp yeniak.

Anutu Pepere tiarim kama yanuwaup, Yesu Kristo, piarpim komre kolapre mayaap pöt ningkën arim naë wiaap.

Ngönënë wotöököröa ngönte

⁵Ni ingre mor sauröa naë omën nant korar wia pöt wotpil wesak ka poutë ngönënë wotöökörö moulmëëmëak nem ök niia pöl Krit kustak niulëën wëaup.

⁶Ne epël ök niiaut. Omën namp pi omnaröa itöök ketre saun won panëëpök öng kopët nampringëp, pim ruuröeta Kristoon kön wi kosang yewesauröak pitëm kentöökë ënëm ëak utpet naën yaaöre pitëm ëltre peparöa ngön wa nemoolaan yaaö omën ke pilëpök ingre moröröa kepönöök moulmëën öp.

⁷Ngönënë wotöököp pi Anutu pim yaat ngarangk yaaupök omnaröa itöök ketre saun won, wotpil öp. Pi pimtën ping wesak ëak ya sangën teënt ëëpan. I ngaat nak kön irikor ëak omnarö köntak mööpan. Monere urömatëën war ëëpan.

⁸Omën kamaatëaanörö ngöntre kar elmëëp. Kön ompyautaring wë wotpil ompyaö öp. Pimtë wëwëet ngarangk ëëp.

⁹Pi tenim ngönën kë rë yanuul pöt taë wes wak öp. Pël ëëë ngönën kë pöt rë moulööre omën ngön pöt wa yoolëauröa kaaröt tekeri wasö pël ëëp.

Krit kustak kaar omnarö selap wakaima

10 Omën selap ngön wa yoolëaurö wë. Pit ngön mosut ëak morök yaalni ke pilörö selap Yuta omën, “Ar Anutuu ngönta ënëm panë ëenëen arim koröp kaut ileë,” kaar pël yaaö pöröa naëaanörö.

11 Pit monere urömat öpënëak ngönën naëpanëët aö ompöröere pitëm öngre ruurö utpet yemowesaurö. Pötaanök ngönënë wotöökörö ar pit il mowarieë.

12 Pitëmtë Krit kustakaan ëwat omën nampök epël ök ëa. “Krit omnarö ten kaar yaurö. Ten animauröa ök kë köntak yeem wisën yaurö.”

13 Krit ëwat omën pöpë ök ëa pöt yaapët. Pötaanök pitëm kön wi kosang yewesaut taë wesak öpnaan kosang wesak ök maë.

14 Pël ëak pit Yuta omnaröa ëaröa ngön pasutre omën ngön këët wa yoolëauröa ngön kosang wesak ya pipotön kat wiipan pël maë.

15 Omën pitëm lupötë kölam wë pörö pit omën poutön kön wiin kölam via pël yaurö. Ën utpetatök pitëm lupötë utpet wasën Kristoon kön wi kosang newasën yaaö pörö pit omën poutön kön wiin kölam won pël yewas. Pöt pitëm könre lupöt pu wariin ompyaöre utpet pöt kom naën yaurö pötaanök.

16 Pël yaëetak Anutuun ëwat wë pël yauröak pitëm yaautök pi kasëng yemangk pöt pet yaalni. Anutuuk pitën itaangkën utpet pan ëen pit pim ngönte wa olëak omën ompyaut ëëpënëak ëen pangk naën yaurö.

2

Öngre omp ulöpöröa ngönte

¹ Pit utpet ke pipot yauröak ni pöt ngönën keët pëen rë mouL.

² Omp ulöpöröen i ngaat nak kön irikor eëpan pël ma. Pit omën ompyaut yaëen omnaröak pitën ping wesak ap. Pël äak pitëmtë wëwëat ngarangk eëp. Pël yeem këekë wesak kön wi kosang wasöore neneren lup sant elmë pël eëp. Pël yaëen omnaröak pitëmëen utpet yaalmëen pöt kosang sak öp.

³ Tapël öng ulöpöröenta öngöröa Anutuu ngön ngaarëk yewa pöl eëpnaan ök ma. Pit omnaröen utpet wesak mepan. Pël äak i ngaat keimön nëmpan. Pël yeem öng ulwas ompringöröen ompyaö yaaö pöt rë mouLak pet elmëep.

⁴ Pël äak öng ulwas pöröen pet elmëen pitëm ompre ruuröen lup sant elmëepnaan.

⁵ Pël äak pitëmtë wëwëat ngarangk äak lup kölam öpnaan. Pël yeem pitëmtë kaatë omnant këekë wesak ngarangk äak omnaröaan ompyaö elmëak ompöröa ngönöt ngaarëk öpnaan. Pit pël yaëen pöt omnaröak pitëm yaautön itenak Anutuu ngönten utpet wesak naëpan.

Omp ulwasöröa ngönte

⁶ Öngre omp ulöpöröen mëea tapël omp ulwasöröenta ök ma. Pitëmtë wëwëat ngarangk eëpnaan kosang wesak ök ma.

⁷ Ni ompyaö yaaö pötaan wotöök rëak wëen omnarö nim yaaö pöten itenak ök eëp. Ni rë mouLömëen, wotpil wë këekë wesak rë mouL.

⁸ Ngön kë omnaröak wa utpet wesak naën eëpna pöt pëen ök ma. Pël eën nim kööre tokörö pit tiarën

utpet wesak niapënëak ök eën pangk naën eën öö sēpnaan.

Inëen ruuröa ngönte

⁹ Inëen ruuröen pitēm kaöaröa ngönöt ngaarëk wak ompyaö wesak ya mēngkēn pit itenak ya erēpērēp ēēpnaan ök ma. Pitēm kaöaröen ngön utpetat kangiir mēpan.

¹⁰ Pit pitēm kaöaröa omnant kēkain ēēpanēp ompyaö wesak pitēm ngönöt ngaarëk öp. Pël eën pit itenak, “Yok pangk yaë,” pël wasēpnaan. Inëen ruurö pit ya ompyaö ke pil yamēngkēn Anutu tiarim kama yānuwaup pim ngönēnte ngaarëk sēen omnaröak itenak kōn wiin, “Ngön pöt ompyaut,” pël wasēpnaat.

Tiar lup kölām wē Kristo pim akun kaöaöön kor öpa

¹¹ Anutu pi yang ël epotē omēn pourö kama niöpënëak pim komre kolap pöt tekeri wes nina.

¹² Komre kolap pötak Anutu kasēng menak wēaö pötēre yangērakē kentēre kaur pöt sēp wesak e yangērak wē eptakēer tiarim wēwēat ngarangk ēak wotpil wē omēn Anutuu ēnēm yaauröa wēaul öpenēak rē yānuul.

¹³ Pël eën tiar wēwē pötakēl wē kōn kosang wiak kē ompyaö oröön erēpsawi ēēpena pōten kor eim wē. Yaap, tiar kor eim wēen Yesu Kristo yaaröön pim ēwaat tekeri sēen itaampēnaat. Pi tiarim Anutu, ompyaö yānuwas pöp,

¹⁴ tiar utpetatē öngpōkaan kama niwak kölām niwasēn pim omnarö pël sak wē kosang wesak ompyaö yaaö pöt ēēpenēak pim wēwēet tiarimēn keimōn naën kēsangēn elniak wel wia.

15 Ngön pipot pout ök ma. Weëre kosang nina pöt pout wak wë ngön pipot öpnaan ke urak mëak wa olapanëen kosang wesak ma. Pit niin kön wiin iraan nim ngönte wa olapan.

3

Tiar wëwë ompyautak kosang sak öpa

1 Nim ingre mor sauröen yang ngarangköröere kaöaröa iri öpnaan ngolöp wesak ök ma. Pit ngönöt ngaarék wak wëen ya ompyaö nant mangkën pöt mëmp.

2 Pit omnaröen utpet wesak mëak ngön kosang mepanëp ompyaö elmëak ëpre wiap elmëëp.

3 Tiar ngaan Setenök morök elniin ngön këeta kanö irikor ëak köpël wë ngön wa olaimaurö. Pël ëak tiarim wëwëat ngarangk naën kentre kauratë ënëm pëen eimaurö. Kët ël epotë tiar utpet yaëen omnarö tiarën kaaö yaalniin tiarimëntta neneraan kaaö eimaurö.

4 Pël ëauröak Anutu tiar kama yanuwaup pim ompyaö elniire lup sant elni pël yaaö pöt tekeri wes ninak

5 kama niwaurö. Pi tiarim wotpil yaautaan won, pimtë yakömtak pël elniaurö. Pi tiarën yaköm elnieë tiarim lupöt irak pim ru niwasën Ngëëngk Pulöök tiarim lupöt ngolöp niwesa.

6 Anutuuk Yesu Kristo tiar kama yanuwaaupë tiarimëen elnia pötaan Ngëëngk Pul pö tiarim naë wes mëen wais kaamök kësang elnia.

7 Anutuuk komre kolap elniak, “Wotpilörö,” pël niak yaö niwasën kön kosang wiak kor wë wëwë kosangët öpenëak pël elnia.

8 Ngön pipot yaapöt.

Taitas, nem kentöök ni omën Anutuun kön wi kosang wesaurö omën ompyaut eim öpnaan kosang wesak omën yaap pipot eëpnaan ök ma. Pipot ompyaut, omnarö kaamök yaalni.

⁹ Ngön utpet ke epëlöt kasëng man. Ngön mosutëen nga elngan. Eëre körööröa songönöt kaö wesak angan. Moses pim ngön kosangtak wia pötön nga angan. Omën pipot pout mosut, kaamök naalniipanëet, pötaan kasëng man.

¹⁰ Eën omën namp ngön kaar ëak ingre morörö kom yaalmëen pöt akun nent ma nentepar wotpil mowas. Pël eën pi kat nawiin yaëen pöt kasëng moman.

¹¹ Ni ewat wëen. Omën ke pilëp korar wë utpet yaaup. Pimtë yaaut tiarën pet yaalni.

Ngön mëet

¹² Ne Atemas ma Tikikas namp nim naë wes mëen wais orööpna pötak teentom nem naë Nikopolis kakë wais. Ne kopi akunaöök pörek ömëak kön yawi pötaanök.

¹³ Ni Sinas, Rom ngön kosangöt ewatëpre Apolos piarip kaamök ompyaö elmëak kamtaöökë omnant menak wes mëen sëp. Piarip omnantön ngöntök eëpanëen kaamök elmë.

¹⁴ Tiarim ingre mor saurö pitta ompyaö yaauta yaat këëkë wesak mënak kosang sëp. Pël yaëen narö koröpöökë omnant eël yaëen pöt kaamök elmëen pitëm ngönëntak wëaut kë eëpnaat.

¹⁵ Omën neering wëaurö pit pourö niin yoöre ërëp yenia. Ngönëntak lup sant yaalni pöröenta tapël yaalmë pël ök ma.

Anutu pim komre kolap pöt ar pouröa naë
wiaap.

[Yok pi tapët.

Ne nim pepap, Pool.]

NGÖNËN PEPEWER
The New Testament in the Weri Language of Papua
New Guinea
Nupela Testamen long tokples Weri long Niugini

copyright © 1984 Wycliffe Bible Translators, Inc.

Language: Weri

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 18 Apr 2025 from source files dated 31 Aug 2023

ec1ac06d-1c8c-5be3-8326-dcf0ceacd4c2